

**Propempticon inaugurale de discreto sensu circa studium anatomiae /
[Johann Juncker].**

Contributors

Juncker, Johann, 1679-1759.
Universität Halle-Wittenberg.

Publication/Creation

[Halle Magdeb] : [J.C. Hilliger], [1730]

Persistent URL

<https://wellcomecollection.org/works/mz8ktvn5>

License and attribution

This work has been identified as being free of known restrictions under copyright law, including all related and neighbouring rights and is being made available under the Creative Commons, Public Domain Mark.

You can copy, modify, distribute and perform the work, even for commercial purposes, without asking permission.



Wellcome Collection
183 Euston Road
London NW1 2BE UK
T +44 (0)20 7611 8722
E library@wellcomecollection.org
<https://wellcomecollection.org>

JOANNIS JVNCKERI
MED. DOCT. ET PROF. PVBL. ORDIN.
PROPEMPTICON
INAVGVRALE
DE
DISCRETO SENSV CIRCA
STVDIVM ANATOMIÆ.

Non minima profecto humanae mentis ægritudo ex eo concluditur: quod in tramite medio, qui tutissimus est, admodum difficulter incedere possit, sed per varia potius diverticula, in utrasque partes abeuntia, seu ex uno, ut loquuntur, extremo in alterum facillime digrediatur. Qui tristes in avia saltus sicut in quam plurimis mortalium actionibus toto die observandi sunt: ita in studiorum quoque cursu sæpius committuntur, & ad viam rectam deferendam auctores existunt. De quibus noxiis excursionibus ut specialiori adplicatione pauca dicamus: studium anatomicum, seu artificiosam illam cadaverum dissectionem, in medium proferemus. Quod si enim & antiqua & nova tempora sedulo perlustremus: tum insignes hujus studii vicissitudines, differentem illius æstimationem, disparia de illo judicia & variantem in eo exercendo industriam reperimus. Mittimus autem jam tempora antiquiora, utpote satis obscura, & nostræ tantum ætatis rationem habemus. Atque in hac prægresso proxime sæculo periodos admodum discrepantes offendimus; dum hoc studium iam negligentius, iam maximo cum fervore & conamine tractatum fuit. Erant etenim dies, in quibus plurimi anatomen oculum quasi splendentem omnis solidæ eruditionis habebant, & ad maiorem perfectionem illam deducendam certatim quasi laborabant. Et hic quidem ardor non tantum in Medicorum animis flagrabat, verum etiam aliarum scientiarum cultores ita incendebat, ut, teste *Diemerbroeckio*, dubitasses, num Medicorum, an Philosophorum studium tum temporis habenda fuisset anatomia.

mia. Quum vero a medico sine, qui totus practicus est,
 non pauciores hic aberrarent, & in solis fere physico-
 mechanicis utilitatibus, immo subtilitatibus, acquiesce-
 rent: tum non defuere Viri perspicaciores, qui hanc e-
 tramite excursionem merito suo accusarent, monentes, in
 hisce primis elementis non esse subsistendum, sed ad usum
 omnia practicum dirigenda. Verum enim vero salutarem
 hanc admonitionem multi tam sinistre interpretabantur,
 ut contra auctorum intentionem ad alterum illud extre-
 mum, videlicet ad studii anatomici negligentio-rem tracta-
 tionem, prolaberentur, & turpi potius otio, quam cada-
 verum foetori, sese exponerent. Tandem a proximis
 nunc annis novi impulsus hoc sectionis studium non me-
 diocriter excitarunt. Vnde quidem in novis anatomiae in-
 ventis & antiquorum errorum correctionibus ætas nostra
 multum gloriatur: num vero, extrema evitando,
 tramite medio omnes hic incedant, & ad usum vere pra-
 cticum obtinendum nervos suos intendere conentur, alio-
 rum iudicio nos relinquemus. Essemus interea admodum
 iniqui, si industriam illorum Virorum, qui admirandam
 corporis nostri structuram accuratius perscrutantur, &
 tædiosum hunc laborem pro oblectamento quasi habent,
 gratissimo animo non agnosceremus. Immo turpe esse
 studioso medicinæ existimamus, qui commoda huius studii
 addiscendi occasione fruens, illud vel per ignaviam vel
 adscitam nauseam vel quamcumque aliam excusationem
 negligeret. Licet enim in hac quoque re certi modi ac
 fines sint agnoscendi, & accuratissima anatomes pervesti-
 gatio tales usus medicos, qui totum negotium absolvant,
 minime ferat: hoc tamen studii medici ornamentum tan-
 to minus prætermittendum est, quanto breviori tempo-
 re illud potest comparari. Quis enim nescit, a juvene,
 qui felici memoria & oculorum acie præditus est, intra

semestre spatium multum anatomicæ cognitionis posse hauriri?

Occasionem hac de re dicendi præbuit Vir Iuvenis nobilissimus & præclare doctus

GEORG DANIEL BOESSEL

CANDIDATUS MEDICORVM HONORVM DIGNISSIMVS.

Hic enim in dissertatione sua inaugurali *de usu myologiae medico* exponens, media & tutissima via incedit, atque exemplo suo, extrema esse fugienda, iuventutem studiosam docet. Cum enim probe nosset, viri prudentis esse, attendere tum ad omnia, tum maxime ad verum scopum: minime in eo acquievit, quod in anatomia, quam laudabili industria exercuit, intimam musculorum structuram perspexisset, & usum eorum mochlico-mechanicum adnotasset; sed eo animum direxit, ut, cum peruideret, universam musculorum structuram mechanicam, quatenus mechanica est, ad læsiones illorum reparandas nil conferre, sinceriorem myologiae usum, nempe medico-practicum, in dissertatione sua potissimum indicaret. Quod reliquum est, vitæ rationem, pro more in academiis recepto, breviter exponemus.

Lucem hanc adspexit *Subla*, quæ civitas est *Hennebergici* comitatus, anno 1704. d. 15. Nov. honestissimis parentibus prognatus: videlicet patre *Georgio Sigismundo Boessel*, ejusdem civitatis senatore meritissimo; matre autem *Barbara Christiana Hoffmannia*, senatoris ibidem spectatissimi filia. Prima studiorum fundamenta in schola patria iecit, & exactis in ea aliquot annis ad finis eius *Gubizius*, Goldlauteranae ecclesiae minister meritissimus, in erudiendo illo & formando singularem plane fidem & industriam

dustriam privatam comprobavit. Post hæc illustris gymnasi *Schleusingensis* cives factus est, atque triennii spatio cursum ibidem scholasticum feliciter absolvit. Vnde anno 1723. in *Fridericianam* nostram se recepit, & omni viri-um facultate id fecit, quo modo artem medicam dextre perdisceret. Eum in finem apud Illustrum *Fridericum Hoffmannum*, Consiliarium aulicum ordinisque medici Seniorum, audivit collegia, ut de erroribus in medicina ex anatomiae ignorantia ortis, de materia medica, de casibus practicis. Audivit quoque Viri itidem illustris *Michaëlis Alberti* Regis aulici & ecclesiastici Consiliatoris prælectiones physiologicas, pathologicas, therapeuticas generales & speciales; physicam porro dogmaticam, chemiam & deniq; collegium de morbis mulierum. Præter hos exercitissimi Professor *Heinrici Bassii* lectiones anatomicas & chirurgicas frequentavit. Neque vero studium philosophicum neglexit: namque audivit Excell. *Schneideri*, Consiliarii aulici, collegium logicum, Illustris *Gundlingii*, humanis rebus nunc exempti, philosophiam moralem, & Excell. *Io. Iack. Langii* physicam experimentalem & mathesin. Absoluto triennii academici cursu anno 1726. *Berolinum* se recepit, & studio anatomico, manu ducente Viro Consultissimo D. D. *Budeo* ulteriorem operam dedit; non minus autem in chemicis Viri Excell. D. D. & Prof. *Neumannii* strenuus fuit auditor. Postea *Halam* redux meam quoque praxin clinicam per integrum annum frequentabat. Deinde, peculiari in anatomiam & chirurgiam ardore excitatus, *Lutetias Parisiorum* anno 1728 proficiscebatur; ubi Viros celeberrimos, in anatomicis Dominos *du Vernay* & *Winslavi*, in chirurgicis Dom. *Morand* & *Bourtau*; in embryulcia Dom. *Gregoire* & in morbis denique oculorum Dom. *Saint-Yve* docentes habuit. Tan-

dem agnatos suos, qui Regi Daniæ a consiliis sunt, Hafnia visitans in nosocomium marinum, vulgo Queßsch-Haus, se contulit, & in illo praxin clinicam de novo in usum revocavit.

E quibus omnibus satis innotescit, quod nobilissimus Candidatus noster tempus suum bene ac prudenter studiis posuerit. Vnde ordo noster Medicus lubens ad examen illum admittens talem judicavit, qui gradum Doctoris Medici tueri possit; de qua dignitate ego quidem aperto animo ei gratulor, & felicitatem divinam sincere exopto.

Ceterum ut conscriptum hunc inauguralem, die XXI. Junii instituendum, præsentia sua illustriorem reddere velint litterarum, Mæcenates ac Patroni, est, quod officiose ac decenter oro. P. P. in Regia Fridericiana Hal. Mag-

deb. XII. ante Cal. Jun. A. O. R.

clō lccc xxx.

Non eadem tellus fert omnibus omnia grata.
Hæc gustum sapidis delectans, altera visum
Formosis pascens. Varias hinc visere terras
Flexibiles animi cupiunt. Sua quemque voluptas
Huc trahit, ut quidvis quovis de flore lucretur
Sedulus instar apum. Rata hæc mihi BOESSEL habebis
Perdoctus; literis distincta ad littora lectis,
Phœbea hic cupiens Mitra sibi tempora cingi:
Gallia sic mores celebrat, Germania laurum
Dat tibi; tranquillam promittit Dania sedem.
Gratulor! & quoniam patrios jam quærere Lares.
Est tibi mens; voveo: felix utaris iturus
Numine propitio! Medicus divinus in arte
Sis patriæ; mihi sis quo lætar verus amicus.

*Hij Doctissimo Dom. Auctori Amico in paucis honoratissimo summis
in arte medica honores acquirenti gratulari voluit.*

JOANNES PIPER,
Cimber-Danus Med. Stud. oppon.